

# Nossas «vuschs» politicas e sonoras

## Chor masdà dal cussegl grond

DA GION NUTEGN STGIER / ANR

■ **Al'ur da la sessiun da zercladur dal parlament ad Arosa ha il chor cun dunnas ed umens dal cussegl grond adina er gi ina prova da chant. Il chor stat sut la direcziun da deputà Urs Hardegger. A la fin d'avust da quest onn vegn la furmaziun politica a sa preschentar a Laax.** L'obligaziun primara da las commembras e dals commembers dal cussegl grond è bain da sa profundar cun las actas politicas e betg cun chant. Quai è er vegnì fatg ils ultims trais dis en il center da congress ad Arosa e tuttina han radund 30 deputadas e deputads anc chattà ina mes'ura per sa deditgar al chant. Da las 13.30 fin a las 14.00 era in local en il bajetg da congress dad Arosa reservà per la prova da chant dal Chor masdà dal cussegl grond. Quel ha ina tradiziun da bunamain 20 onns ed è vegnì reactivà avant dus onns dad *Urs Hardegger*, il deputà da la Partida burgais-democratica. Suentier che l'anteriur deputà *Martin Butzerin* dad Arosa veva dirigi prest 20 onns il chor è quel per paucs onns betg pli stà activ. Urs Hardegger, ch'è dapi il 1997 commember dal cussegl grond, ha lura introduci da nov quella furmaziun da chant nunutida.

**Strusch in auter parlament ha in chor** Dapi sis onns segna Urs Hardegger er per la direcziun dal Chor viril Seewis. Da diriger il chor da las deputadas e dals deputads saja bain tut in'otra chausa, ina chausa main seriusa. Bel saja che quel chor cun 30 chantaduras e chantadurs saja independent dad ina partida. Strusch in da quel chor disturba quai sch'el ha da chantar dasper in ami u amia dad ina otra partida. Durant las provas da chant vegn er betg fatg politica, qua sa concentreschan tuts sin notas, texts e segns dal dirigent. El conferma er che tuts sajan cun plain engaschament da la partida a las provas e quai saja plaschaivel. «Jau crai che strusch in auter parlament en Svizra ha in chor», manegia Urs Hardegger cun in surrir. Plaschair ha el er che intgins commembers da la regenza chantan cun il chor. Ad Arosa ha quella furmaziun cunzunt exercità per la festa da *Vitus Dermont*, il nov president dal cussegl grond che ha lieu a la fin d'avust da quest onn a Laax. Qua vegn il chor a chantar duas melodias enconuschentas «La Patria» tenor in text dad Andrea Steier e mess en notas da Tumasch Dolf, sco er «La sera sper il lag», cun in text da Flurin Camathias e la melodia da *Gion Balzer Casanova*. La terza chanzun ch'il chor vegn a chantar è betg anc enconuscenta.



Il Chor masdà dal cussegl grond stat sut la direcziun dad Urs Hardegger.



Per las deputadas è chantar ina buna gulivaziun tar la politica.

FOTOS G. N. STGIER



Quai vala er per quels quatter deputads: Andreas Thöny, Christoph Jaag, Daniel Blumental e Kenneth Danuser (da san.).